

Kontuola

ANTZUOLA / Egubakoitza / 2003ko martxoaren 21a / 151. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Oinezkoen babesgune handi bat egingo dute Egurribai parean

AINTZANE IRIZAR

Gipuzkoako Foru Aldundiak Antzuolako goiko aldeko sarreran hainbat aldaketa egiteko proiektua egin berri du. Orain dela gutxi bidali diete proiektu hori Udaleko arduradunei. Egurribai baserriaren parean egingo dituzte errepideko lan horiek.


Oinezkoen babesgune handi bat (irratxo bat) egiteko asmoa dute Diputazioko arduradunek Egurribai baserriaren parean, Deskarga alderako errepidean. Hori ere erakusten du Diputazioak Antzuolako Udalera bidali berri duen proiektuak.

Diputazioko arduradunen asmoa da lehenbailehen lan horiekin hastea. Gainera, ez dira oso lan konplexuak izango, eta ez dute denbora luze behar izango lanok egiteko.

HELBURUA, ABIADURA MURRIZTEA

Lan horien helburua izango da, batez ere, Deskarga aldetik behera datozen ibilgailuen abiadura murriztea. Horrela, oinezkoen babesguneak balaztatzea eragingo die goitik behera abiadura handian datozen ibilgailuei, eta Errekalde parera iritsi orduko, abiadura motelagoa eroango dute.

Kontuan hartu behar dugu oinezko ugari ibiltzen direla erre-



130 bat metro luze izango da Egurribai parean egingo duten oinezkoen babesgunea.

pidetaren alde batera eta bestera oinez. Istripu bat baino gehiago eragin du abiadura handiak inguru horretan, eta arrisku handia dago. Horregatik, Udaleko arduradunek behin baino gehiagotan eskatu diete Diputazioari saihasbidearekin zerbait egiteko.

Horrela, orain dela urtebete, ia zozkatsan, hain zuzen, egin zituen lehendabiziko lanak Diputazioak. Orduko hartan, Errekalde parean oinezkoendako babesgunea egin zuen; hau da, oinezkoendako pasabidearen inguruan altueradun gune bat

egin zuten, oinezkoak babesteko. Oraingo proiektuarekin, berriz, ibilgailuek Errekalde parera iritsi baino lehen abiadura murriztea izango da helburua.

Aurrerago, Lapatza pareko bidegurutzean ere aldaketaren bat egiteko asmoa dute.

PRESOAK

Jose Luis Erostege 'Eltzikorta' Manzanares herrian erroldatu dute haren baimen barik

AINTZANE IRIZAR

Jose Luis Erostege *Eltzikorta* antzuolarra Herrera de la Mancha espetxean dago preso duela urtebete ingurutik. Komunikabideen bitartez jakin dugu oraingo astean, beste hainbat preso bezala, Manzanares herrian erroldatu dutela, haren baimen barik.

Oraingo astean *Gara* egunkariaren bitartez jakin dugu Herrera de la Mancha espetxean preso dauden 17 euskaldun Ciudad Realgo Manzanares herrian erroldatu dituztela.

Preso horietako bat da *Eltzikorta*. Abokatuen esanetan, presoek ez dute erroldatze horretarako baimenik eman, ezta dokumenturik sinatu ere, legediak

eskatzen duen moduan.

Antzuolako Udaleko arduradunek esan digutenez, ez dute Manzanaresko Udalaren inolako jakinarazpenik jaso, horrelako kasuetan gertatzen den moduan; orduan, oraingoz, Antzuolan erroldatuta jarraitzen du.

Herriar batek beste herri baten erroldatu nahi duenean, herri horretako Udalaren zere-

gina da aurreko Udalari eskaera horren berri eman eta baja emateko eskatzea.

Erostegearen senitartekoen argi laga digute Jose Luisek ez duela Manzanaresen erroldatze inolako asmorik, Antzuolan erroldatuta jarraitu nahi duela. Dena dela, ez dakite Jose Luisi errolda aldaketa horren gainean zelako informazioa eman dioten.

LABUR

Bihar, zapatua, umeendako ipuin kontalaria

Antzuolako Udal Liburutegiak antolatuta, Antton Irusta ipuin kontalari bizkaitarraren emanaldia izango dugu bihar, zapatua, *Katxiren ibilera* izenburupean. Liburutegian bertan izango da saio hori, 18:00etan.

Ez da ipuin kontaketa soilak izango; izan ere, aho korapiloak, magia eta ipuinak uztartuko ditu Irustak saioan. Ez dago adin mugarik emanaldi horretarako; hortaz, liburutegiko ateak zabalik egongo dira ipuinak entzun nahi dituenentzako.

Eskolako hitzaldia hilaren 31ra atzeratu dute

Datorren astelehenean, hilaren 24an, nerabetsunaren gaineko hitzaldia ematekoan zen Herri Ikastetxean Xabier Tapia psikologo bergararra.

Bada, atzeratu egin dute hitzaldi hori; hilaren 24an izan beharrean hilaren 31n egingo du berbaldia Tapiak Herri Ikastetxean, nahi duten guraso guztiendako. Hitzaldi horretan nerabeen arazo eta gatazken gainean jardungo du Xabier Tapiak.

Martitzenean 'Egunkaria'-ren aldeko batzarra

Aurreko asteko martitzenean egin zuten herrian *Egunkaria*-ren aldeko herri batzardea sortzeko lehendabiziko batzarra. Han batutakoek aurreko eguneko kale bilkurak antolatu zituzten, baita *Egunkaria*-ren materiala saldu eta hainbat harpidetza egin ere.

Aurrera begira ere hainbat ekimen antolatze asmoa du herri batzordeak. Lehenengo batzarrera joan ez zirenek badute, hortaz, beste batzarra bat hilaren 25ean, 18:30ean, udaletxean.


KIROLA

Domeka goizean jokatuko dute gazte mailako txirrindulariek Uzarragako Igoera

A.I.
Gazte mailako txirrindulariek urtero jokatzeko denboraldi hasieran Uzarragako Igoera. Etzi, domekan, izango dute igoera hori, Aiastui elkarreko kideek antolatuta. 10:00etan hasiko da lasterketa, Antzuolan, eta 12:00etan bukatuko da, Uzarragan.

Antzuolan bertan hasiko dute lasterketa gazte mailako txirrindulariek, goizeko hamarretan. 70 kilometroko ibilbidea egin ondoren, Uzarraga gainean amaituko dute lasterketa, eguerdian, 12:00ak aldera.

Aiastui Txirrindulari Elkarreko antolatu du lasterketa hori; hain zuzen, aurtengoa lasterketa antolatzen duten 28. aldia da.



ARTXIBOA

Asier Muxika gazteak irabazi zuen iaz Uzarragako Igoera.

IBILBIDEA

Esan bezala, goizeko hamarretan Antzuolan bertan hasiko dute lasterketa; Antzuolatik Bergara aldera abiatuko dira eta handik Antzuolara itzuliko dira. Antzuolatik, berriz, berriro abiatuko dira Bergara aldera, eta handik Oñatiraino joango dira. Oñatitik

Antzuolara itzuliko dira. Antzuolatik, berriz, Soralezera joango dira eta, handik bueltan, Uzarraga igotzeari ekingo diote txirrindulariek. Guztira, bi ordu inguru behar izango dituzte 70

kilometroak egiteko, antolatzaileek egindako aurreikuspenaren arabera.

Ibilbide gogorra da, nolana ere. Iaz, esaterako, 116 txirrindularik hasi zuten lasterketa eta

horietatik, 65 txirrindularik bererik ez zuen bukatu ahal izan. Azkenean, esprintean erabaki zen etapa, eta Muebles Ordizia taldeko Asier Muxika txirrindulari gazteak irabazi zuen proba.

HERRITARREN HITZA / Ainhoa Ugarteburu · Soziologoa

Udaberrixa?

Gaur hasiko da jendiak hain maiztasun daben urtarua. Egun batzuk lenau ia geuregana etorritza bazeuan be, ofizialki gaur da udaberriko lenengo eguna. Jendiak aurtun gustora hartuko dau udaberriaren etorreria, euki dogun negu hotz, eta batez be euritsu honen ondoren.

Hala be, eta seguruenetik aspaldi honetan pasatzen jaten moduan, urtaruan aldaketarik gero eta gutxiago poztzen nau, badiardogu urte luzeetan, negu, uda, udazken edo udaberri izan, beti antzerako aurpegi-ekin, kezka berdinekin, eta

eztakitt zeatik baina uste dot udaberri hau be ez dala ezberdina izango. Otsaila motza da, baina notiziaz lepo egon zan, hiru egunian 30 atxilotu, euskaraz egiten zan egunkari bakararra itxi zeben, eta berriz agertu zien tortura salaketak; berriz esaten dot, ez deigun ahaztu urtiak diela atxilotuak torturak salatu dituztela, etengabe. Gerra hotsak, eta espainiar betiko



“Egoeria aldatzen hasteko sasoian gare”

frankisten lotsaga-bekeixia, gehiengo osuak babestuta, nahi daben guztia egiteko aukeria eskutan daukela.

Ez die, ez, garai onak, baina horrek asko kezkatzen banau be, gehixau kezkatzen nau amore emutiak, gauzak horrela darella pentsau eta “tantua eurantzako”, “guriak ein jok/n” esatiak.

Zaila da, ez daukagu babestuta gaen sentimenduik, beldurra

libria da, baina garbi daukat, herri honek badaukala erreazionatzeko gaittasuna, gauzak esan eta egiteko gogua, eta horri eutsi bihar dotsau, sartuta garen tunel beltz honetatik urtetzeko.

Nahikua da! esatia aspaldi pasau zan, oin lan eittia da gure biharra. Batu biharra ikusten dot ez bakarrik defenditzeko baita eraikitzeke be, egoeria aldatzen hasteko sasoian gare. Asko ga, gogua be badauku, indarrak metatzia bezelakoik ez dao aurrera eitteko, batu gaittezen beraz. Behinguatik benetako udaberrixa iritsi dein.

KIROLA

PARTIDUAK

FUTBOLA
Martxoak 22
11:00: Antzuola-Legazpi (2. erreg.)
PILOTA
Martxoak 21 (Udaberri Saria)
20:30: Olalde-Zumaiako (Nag. paletaz)

EMAITZAK

FUTBOLA
Antzuola 3 Amaiak Bat 2 (Erreg.)
Antzuola 3 Beti Ona 0 (Gazteak)
PILOTA
Deba Arroko Txapelketa
Bergara-Olalde (kadeteak) 22-11
Bergara-Olalde (nagusiak) 22-3
Gipuzkoako Txapelketa
Olalde-Ikaskirola (infant.) 18-10

Zabalo Iturgintza S.L.

Bidea eginez

Tailerra: Uzarraga bidea, 10. Antzuola. Tf. 943 78 71 78
Erakusketa: Kalebarren, 1. Antzuola. Tf. 943 78 71 79, Tf. eta F. 943 76 64 73

- Gasa
- Berogailuak
- Haire egokitua
- Enpresen mantenimendua
- Lurrin instalazioak

- Bero-urreztea
- Bainugelak. Proiektuak momentuan DIBaren bidez
- Birgaitze-espeditentak bideratzen ditugu

ABAD

PINTURAK

ANTZUOLA

PAPER PINTATUAK

Jose Gomez Abad

Errekalde 6, 4-B.
Antzuola
943 76 60 19
943 76 60 43
Faxa:
943 76 60 19

INDUSTRI MANTENIMENDUA